



# 21

Niining Leksyona Matun-an Mo Kini

Si Jesus Nagpakita Ngadto sa Pito Ka Mga  
Tinun-an

Si Jesus ug si Pedro

Si Jesus Ug Ang Ubang Mga Tinun-an

Mga Katapusang Pahimangno

**SI JESUS NAGPAKITA NGADTO SA PITO  
KA MGA TINUN-AN****(Basaha ang Juan 21:1-14)**

Ang mga tinun-an namalik ngadto sa ilang mga trabaho sa Galilea. Wala sila makasabot sa buot ipasabot ni Jesus kanila. Busa ang uban kanila namalik sa daan nilang mga buluhaton nga mao ang pagpangisda.

Sa una nilang pagpangisda, naghago sila tibook gabii gayud apan wala sila makakuha. Miduol si Jesus ug misugo nga itaktak ang pukot didto sa usang kilid sa sakayan. Gituman nila kini ug nakakuha ug daghang isda nga hapit dili na nila madaog pagbira ang ilang pukot. Kon mobuhat kita sa ipabuhat ni Jesus kanato, himoon niya ang atong kapakyasan nga kadaugan.

**Buhata Kini**

1. Unsa may gibuhat sa mga tinun-an human magpakita si Jesus kanila?
  - . . . a) Namauli sila sa ilang balay sa Galilea ug nangisda.
  - . . . b) Nag-ampo sila nga mapun-an sa Espiritu Santo.
  - . . . c) Nagsugod sila pagwali sa maa-yong balita.

**SI JESUS UG SI PEDRO**  
**(Basaha ang Juan 21:15-19)**

Makatulo si Pedro milimod kang Jesus. Ug karon si Jesus nangutana kaniya sa makatulo usab. Miingon si Pedro nga bisan pa ug ang tanan niyang kauban mosalikway kang Jesus dili gayud siya magabiya kang Jesus. Apan ang nahitabo mao nga labaw pa hinoon ka daku ang iyang kapakyasan kay sa ubang mga tinun-an. Busa nangutana si Jesus kaniya, “Gihigugma mo ba ako labaw pa niini?” Naulaw kaayo si Pedro sa iyang nabuhat nga paglimod kang Jesus ug nasubo tungod niini.

Miingon si Jesus, “Pakan-a ang akong mga karnero.” Atong masabtan pinaagi niini nga gipasaylo si Pedro sa iyang paglimod kang Jesus. Gihimo si Pedro nga usa ka magbalantay nga maga-atiman kanila nga managpanoo kang Jesus. Miingon pag-usab si Jesus ngadto kang Pedro, “Sumunod ka kanako.”

**Buhata Kini**

2. Unsa may gipangutana ni Jesus kang Pedro?
  - . . . a) “Gihigugma mo ba ako labaw pa niini?”
  - . . . b) “Nganong gilimod mo man Ako makatulo?”
  - . . . c) “Kahibalo ka bag unsaon pag-atiman sa mga karnero.”

## SI JESUS UG ANG UBANG MGA TINUN-AN (Basaha ang Juan 21:20-24)

Si Juan nga nagsulat niining ebanghelyoha dili buot nga mosulti sa iyang ngalan. Siya ang tinun-an nga gipasabot ni Pedro sa iyang pagpangutana ni Jesus nga nag-ingon, "Ginoo, siya **diyay** maunsa man?" Si Jesus mitubag nga wala siyay labot kon unsay ipabuhat o unsay mahita-bo kang Juan. Si Pedro kinahanglan nga magasunod Kaniya nga matinud-anon gayud sa walay pagpanghilabot sa buluhaton sa ubang tinun-an.

Wala magatawag ang Dios sa tanang katawhan aron magabuhat sa mao rang usa ka butang. Dili kita makapasukad sa atong pagabuhaton diha sa mga ginabuhat sa uban. Magaampo kita alang sa kabubut-on sa Dios sa atong kinabuhi ug sa kinabuhi sa uban usab.

### Buhata Kini

#### 3. Unsa may buot masayran ni Pedro?

- . . . a) Unsaon niya sa pag-atiman sa mga karnero nga usa man siya ka mananagat.
- . . . b) Unsay buhaton ni Juan.

#### 4. Pag-ampo sa Dios nga tabangan ka Niya sa Pagbuhat sa Iyang kabubut-on.

## MGA KATAPUSANG PAHIMANGNO (Basaha ang Juan -21:25)

Dinhi sa ebanghelyo ni Juan nakat-onan mo nga si Jesus mao ang Pulong. Pinaagi Kaniya ang Dios makigsulti kanimo. Si Jesus mao ang Anak sa Dios nga nagapakita kanimo kon unsa ang pagkasama sa Dios. Siya mao ang Cordero sa Dios nga nagpakamatay aron sa pagkuha sa atong mga sala.

Si Jesus mao ang dalan padulong sa langit. Dili ka mawala kon sundon mo Siya. Siya mao ang kahayag sa kalibutan ug dili kinahanglan nga magapuyo ka sa kangitngit. Si Jesus mao ang tinapay sa kinabuhi nga makatagbaw sa gigutom mong kalag. Siya mao ang kamatuoran nga nagaluwas kanimo gikan sa mga kasaypanan. Siya mao ang Anak sa Dios nga nasayud ug naka-sabot sa imong gikinahanglan. Siya mao ang Maayong Magbalantay nga nagaatiman kanimo. Siya mao ang pagkabanhaw ug ang kinabuhi nga nagahatag kanimo ug labaw ka madagayaong kinabuhi karon, kadaugan ibabaw sa kamatayon, ug kinabuhing walay katapusan sa umalabot.

Ingon niini si Jesus ug dugang pa gani niini. Siya mao ang imong Manluluwas, Ginoo, Hari nga nahigugma kanimo. Buot Siya nga ikaw mahigugma ug motuman Kaniya. Buot Siya nga mosunod ka Kaniya karon ug makig-uban Kaniya hangtud sa kahangturan didto sa langitnong puloy-anan. Dili ka pugson ni Jesus sa pagsunod Kaniya. Ikaw ang Iyang pabut-on. Gipanghinaut namo nga mosunod ka Kaniya nga matinumnon gayud ug magapahimulos sa malipayong kinabuhi nga ihatag Niya kanimo.



Buot kaming magatabang kanimo sa pagkat-on ug dugang mahitungod kang Jesus aron mamaayo pa gayud ang imong pagsunod Kaniya. Ang International Correspondence Institute dunay ubang mga kurso sa Biblia nga makatabang kanimo sa pagtubo diha sa espirituhanong mga butang. Kon wala pa ikaw makapalista alang sa sunod nga kurso, buhata kini karon.

Kon wala ka masayud kon asa ang maayong simbahan diha sa imong dapit diin makatagbo ka ug mga katawhan nga nahigugma usab kang Jesus, malipay kaming motabang kanimo sa pagpangita niini. Kinahanglan nga makig-uban ka sa ubang katawhan diha sa pag-ampo. Sa pag-simba sa Dios, ug sa pagtuon sa Pulong sa Dios. Makatabang ang pastor kanimo kon duna kay mga problema mahitungod sa espirituhanong mga butang. Ayaw kalimot sa pagbasa sa Biblia ug sa pag-ampo matag **adlaw**, ug ang Dios magapanalangin ug magatipig kanimo diha sa Iyang gugma.

#### Buhata Kini

5. Tapus sa imong pagtuon kon kinsa si Jesus ug unsay Iyang mahimo, unsa may imong pagabuhaton karon?
  - . . . a) Higugmaon si Jesus - sundon Siya sa nahibiling panahon sa imong kinabuhi.
  - . . . b) Padayon sa imong paagi - kalimti ang imong natun-an.
6. Itandi ang imong mga tubag sa mga tubag nga anaa sa katapusan niining leksyona.
7. Sulati ang imong rekord sa estudyante alang sa ika-21 nga leksyon.

### Mga Tubag Sa Ika-21 Nga Leksyon

Kon duna kay 4 ka hustong mga tubag, markahi ang imong grado ug labing maayo; kon 3, markahi ug maayo; kon 2, kasarangan. Kon kubos sa 2 ang imong hustong tubag, basaha pag-usab kining leksyona.

1. a) Namauli sila sa ilang balay sa Galilea ug nangisda.
2. a) "Gihigugma mo ba ako labaw pa niini?"
3. b) Unsay buhaton ni Juan.
5. a) Higugmaon si Jesus - sundon Siya sa nahibiling panahon sa imong kinabuhi.

Gidaghanon sa Hustong Tubag \_\_\_\_\_

Grado \_\_\_\_\_